

Episode 9 - Mga Buhat 4:32-37

Si Bernabe + Pagdumala Nato Sa Kuwarta

Dalikyat

⇒ Naa sa tay dalikyat gamay sa dili pa kita mopadayon sa teksto nga atong tun-an karon. Balikon sa nato pagbasa ang Mga Buhat 2:42-47.

📖 Mga Buhat 2:42-47

⁴² Sila migahin sa ilang kaugalingon sa mga pagtudlo sa mga apostoles, ug sa pagpakig-ambitay, sa pagpikaspikas sa pan ug diha sa mga pag-ampo. ⁴³ Unya ang tanang tawo giabot ug kahadlok ug pinaagi sa mga apostoles nahimo ang daghang mga kahibulongan ug mga ilhanan. ⁴⁴ Ug ang tanang mituo nagkahiusa ug ang tanang butang gisalohan sa tanan. ⁴⁵ Ug gipamaligya nila ang ilang mga katigayonan ug mga kabtangan, ug kini ilang gibahinbahin sa tanan, sumala sa gikinahanglan ni bisan kinsa. ⁴⁶ Unya matag adlaw sa mag-usa sila pagtambong didto sa Templo, ug sa pagpikaspikas sa pan diha sa ilang kabalayan, nagsalo sila sa pagpangaon nga may kasadya ug manggihatagon nga mga kasingkasing, ⁴⁷ nagdayeg sa Dios ug nakapahimuot sa tanang tawo. Ug ang Dios nagdugang ug mga linuwas sa ilang gidaghanon matag adlaw.

⇒ Nakahuman na kita pagtuon niining mga bersikulo, apan timan-an sa nato ang giingon sa bersikulo 47 nga, "nakapahimuot sa tanang tawo".

- Ang tanang mga tawo, nahimuot sa mga magtutuo kang Jesus ug gapasabot kini nga maayo ang binuhatan sa mga naluwas. Dili sila mga gahi. Dili sila pwede tamayon kay maayo, matarong, makadasig ug makakabig ang ilang gabuhaton.
- Maoy hinungdan nga nahimut-an sila sa mga dili magtutuo.
- Walay nakita nga ikasaway sa ilang mga kinabuhi.
- Giampingan nila ang ilang testigos.
- Mga igsoon, importante nga ang matag usa kanato, magpailalom sa mga tudlo sa pulong sa Dios, ug undangan nato ang mga binuhatan nga masaway, nga atong gabuhaton sa wala pa kita maluwas.
- Importante kaayo ni para makabig nato ang atong mga pamilya, mga higala ug mga silingan ngadto kang Jesus.
- Gabasahon man kita sa mga dili magtutuo. Gaubsirbahan nila ang atong mga kinabuhi kung nausab ba kita o kung mao ra gihapon.
- Kung daotan ang ilang makita diri sa ato, basin ila hinuong masaway si Jesus, ug masaway usab nila ang kaluwasan nga gihatag ni Jesus kanato.

Balikon

⇒ Balikon sa nato ang atong nangahibaw-an sa miagi nga mga episode sa Mga Buhat.

- Nahibaw-an na nato ang mahitungod sa pag-ayo ni Jesus sa bakol pinaagi kang Pedro, ug nga niadto gayong adlaw, daghan ang mituo sa mensahe ni Pedro. Nakaabot gani ug 5,000 ang mga magtutuo nga mga lalaki ra, pero kung apil gihip ang mga babaye, mga batan-on ug mga bata, mas daghan pa gyod.

- Apan timan-i mga igsoon nga matag ipakaylap ang pulong sa Dios, aduna gayoy moabot nga mga pagdaogdaog. Makasiguro kita nga maningkamot silang Satanas sa pagbabag ug sa pagdaot sa atong pagpangabig sa mga tawo ngadto kang Jesus.
- Busa dili kita matingala kung daogdaogon kitang mga naluwas, hinuon ato kining paabuton, kay mahitabo gayod.
- Gamiton ni Satanas ang iyang mga tawo sa pagdaogdaog sa mga anak sa Dios.
- Ug maoy nahitabo nilang Pedro, kay sa dihang naayo na ang bakol ug mituo kang Jesus ang daghang mga tawo, gidakop sila ug gibilanggo. Ug pagkaugma, gipaatabang sila sa Sanhedrin isip mga makasasala, apan wala hinuon sila siloti kay nahadlok ang mga pangulo sa mga Judio sa mga tawo, kay nahibaw-an man sa tanang mga tawo sa Jerusalem nga naayo ang bakol pinaagi sa bantogan nga milagro.
- Igo lang gihulga silang Pedro sa mga pangulo ug gidid-an sa pagsulti o pagtudlo pinaagi sa ngalan ni Jesus.
- Apan wala patalaw silang Pedro, kay ilang giprangka diha sa Sanhedrin nga dili gayod sila mapugngan sa pagsulti sa tanan nilang nakita ug nadungog mahitungod kang Jesus.
- Sa dihang gibuhian na silang Pedro, miadto sila sa ilang mga kauban nga mga magtutuo ug ilang gireport ang gisulti kanila sa mga pangulong pari ug mga kadagkoan sa mga Judio. Ug nag-ampo sila nga gadayeg sa Dios ug gasumbong kaniya sa tanang nahitabo, ug nangayo sila kaniya ug kaisog aron makapadayon sila sa pagwali bisan pa adtong kuyaw ug makahahadlok nga ilang kahimtang. Ug giuyog sa Ginoo ang balay nga diha sila nagpundok, nga mao ang pag-YES sa Ginoo kanila ug paghaphap niya sa ilang mga kasingkasing.
- Ug nahibaw-an usab nato sa miagi natong pagtuon, nga naay kataposan sa mga milagro nga gabuhaton pinaagi sa mga apostoles. Usahay naa kitay makita nga milagro karong panahona, apan kasagara dili gayod sama sa mga milagro nga gibuhat sa una, sa panahon sa mga apostoles.
- Wala gayoy tawo nga makaayo sa mga sakit karon nga sama nilang Pedro. Karon, kasagara gapa-doctor kita kung naa kitay sakit ug gamiton nato ang mga tambal nga gihatag sa Dios kanato. Ug kung dili kita magpa-doctor panahon nga kita adunay dako nga sakit, basin mamatay kita. Karon, dili kita magpaabot nga milagrohan kita sa Ginoo kung naa kitay dako nga sakit, apan ato hinuon kining idangop kaniya aron hatagan kita niya ug kaalam.
- Gihisgotan nato pagbalik ang nabasa nato ganiha sa Mga Buhat 2:42-47, nga maayo ang testigos sa mga magtutuo, ug nakapahimuot sila sa tanang tawo.
- Ug karon, magbasa kita sa kataposan nga bahin sa Mga Buhat kapitulo 4, ug naa kitay dugang mahibaw-an mahitungod sa binuhatan sa mga magtutuo sa Jerusalem.

Mahitungod Sa Kuwarta

Mga Buhat 4:32-37

³² Ug ang pundok sa mga mituo nagkahiusa sa kasingkasing ug hunahuna, ug walay miingon nga iya rang kaugalingon ang bisan unsang mga butang nga iyang gipanag-iya, kondili ilang gisalohan ang tanan nilang butang. ³³ Uban sa dakong gahom, ang mga apostoles naghatag sa ilang mga pagpamatuod sa pagkabanhaw sa Ginoong Jesus, ug ang dakong grasya diha kanilang tanan. ³⁴ Walay tawo nga nakulangan diha kanila kay kutob sa may kayutaan o mga balay namaligya niini, ug ang halin ilang gidala ³⁵ ug gibutang sa tiilan sa mga apostoles. Ang pagpang-apod-apod gihimo ngadto sa matag usa sumala sa panginahanglan ni bisan kinsa.

³⁶ Busa si Jose, nga gianggaan sa mga apostoles ug Bernabe (nga ang kahulogan, anak sa pagdasig), nga usa ka Levihanon nga taga-Cipro, ³⁷ mibaligya sa usa niya ka luna nga yuta ug ang halin iyang gihatod ug gibutang sa tiilan sa mga apostoles.

⇒ Sa ato pa, nagkahiusa ang mga magtutuo sa kasingkasing ug hunahuna. Ang importante alang sa matag usa kanila, mao ang pulong sa Dios ug ang ilang pag-alagad kaniya. Managsuon ang ilang paghinigugmaay ug nagkahiusa sila pag-alagad kang Jesus.

→ Ug gipanag-ambitan nila ang tanang butang, kay ang mga igsoon nga naay kakulangan, gahatagan sa mga igsoon nga adunay ila.

→ Nagtinabangay ang tanang mga naluwas sa mga kinahanglanon sa kada usa.

→ Ang mga naluwas nga may mga kayutaan o mga balay, namaligya niini ug ang halin, ilang gidala ngadto sa mga apostoles aron itabang ngadto sa mga walay mahimo.

→ Ug ang usa kanila nga nagbaligya sa yuta, mao si Bernabe, nga ang kahulogan sa iyang ngalan, "anak sa pagdasig".

→ Ug nagpadayon ang mga apostoles sa pagwali nga si Jesus, gipatay sa mga Judio apan gibanhaw sa Dios. Buhi na si Jesus ug ang iyang ngalan, mao ray bugtong makaluwas sa tawo.

→ Ug gagrasyahan ug gapanalanginan sa Dios ang tanang mga magtutuo nga nagpailalom sa tudlo sa mga apostoles.

→ Sa nabilin pa aning episode, hisgotan sa nato ang topic nga kuwarta. Atong susihon ang pulong sa atong Amahan kung unsay iyang gusto nga pagdumala nato sa kuwarta.

→ Atong basahon ang pila ka mga bersikulo gikan sa pulong sa atong Amahan.

Hageo 2:8

Ang plata akoo ug ang bulawan akoo usab, nag-ingon ang Ginoo sa mga panon.

Salmo 24:1

Iya sa Ginoo ang yuta ug ang tanan nga anaa niini, ang kalibotan ug ang mga nagpuyo niini.

Job 1:21

Ug siya miingon, "Hubo ako nga migula gikan sa tiyan sa akong inahan ug hubo ako nga mobalik; ang Ginoo naghatag ug ang Ginoo nagkuha. Bulahan ang ngalan sa Ginoo."

Deuteronomio 8:17-18

17 Pagbantay kamo kay tingali unya ug moingon kamo diha sa inyong kasingkasing, 'Ang akong gahom ug ang kusog sa akong kamot maoy naghatag kanako niini nga bahandi.'¹⁸ Apan hinumdomi ang Ginoo nga inyong Dios kay siya mao ang naghatag ug gahom sa pagbaton sa mga bahandi, aron mapamatud-an niya ang iyang kasabotan nga gipanumpa niya sa inyong katigulangan sama niining adlaw.

⇒ Sa ato pa, kinahanglan nga ato kining masabtan pag-ayo.

→ Si Ginoo ang tinuod nga tag-iya sa tanan natong kuwarta, ug sa tanan natong kabtangan. Basin naa kay gahawiran nga kuwarta ug kabtangan, apan ang tinuod dili ikaw ang tag-iya niini, ug dali kining mabawi sa Ginoo gikan kanimo kung maoy iyang gusto. Iya sa Ginoo ang tanan, dili atoa!

→ Ang tanang ania sa kalibotan, iya man sa Ginoo.

→ Si Job, usa ka dato kaayo nga tawo, apan nagtestigos siya nga gipanganak siya sa kalibotan nga walay dala bisan unsa, ug kung ilobong na siya, wala gihapon siyay madala. Ug mao gihapon kini ang kahimtang sa matag usa kanato nga mga tawo. Maghatag ug magbawi si Ginoo, ug dalaygon ang iyang ngalan!

- Ang atong kaalam ug ang atong kahimo sa pagpanguwarta, gikan sa Dios. Kinahanglan nga dili nato kini limtan, kay kung dili kita niya tagaan ug kaalam, wala gayod kitay mahimo ug dili kita makakuwarta.
- Kung masabtan unta nato kini nga kamatuoran, atong masabtan pag-ayo nga iya sa Dios ang tanan, ug iya usab ang tanan natong kabtangan. Ug kung masabtan nato kini pag-ayo, dali usab kita magiyahan sa Dios sa paggamit sa atong kuwarta tukma sa iyang gusto ug katuyoan.
- Apan kung gatuwa ta nga gikan ra sa atong kahibalo ug paningkamot ang atong mga kabtangan, ug kung gakuwara nato pag-ayo kay basig mawala, basin lisod kanato ang paggamit sa atong kuwarta alang sa katuyoan sa Dios.
- Ania'y mga tudlo alang sa mga igsoon nga dato ug alang usab sa mga igsoon nga pobre.
- Ayaw kahiubos niining mga tudlo kay gikan sila sa Dios ug iyang gihatag aron makatubo kitang tanan, dato kita o kung pobre.

Tambag Para Sa Mga Pobre Nga Igsoon

- ⇒ Ang tukoranan nga tudlo sa Ginoo alang sa kada usa kanato, kinahanglan nga magtrabaho kitang tanan ug maghago para sa atong mga kinahanglanon ug sa mga kinahanglanon sa atong pamilya ug makahatag kita sa nanginahanglan. (Efeso 4:28; 1 Timoteo 5:8; 6:18)
- Ug nag-ingon pa ang Ginoo nga ang dili motrabaho, dili pakan-on.

2 Tesalonica 3:10

Kay bisan gani sa diha pa kami uban kaninyo, among gihatag kaninyo kining maong sugo: Kon adunay dili buot mobuhat, ayaw siya pakan-a.

- ⇒ Sa ato pa, ang tawo nga dili gustong mobuhat o dili motrabaho, dili siya pakan-on. Ang tapolan nga tawo nga dili gusto maghago, ingon ang Dios nga dili ipakaon.
- Dili gusto sa Dios nga magsalig ra ang tawo ug dili motrabaho.
- Busa kung gusto ka nga diha kanimo ang panalangin sa Dios, kinahanglan nga motrabaho ka.
- Mga igsoon maayo kung dili nato tuyuon ang atong kalisod. Usahay, mao ray makapuno sa kasingkasing sa mga tawo ang pagpangutang ug ang paglending. Apan kasagara, ang mga igsoon nga moapil sa lending ug gapangutang ug kuwarta, pirmi gihapon sila gakalisod ug gakahutdan ug kuwarta. Ug mahimo sila nga mga ulipon sa mga tawo nga nautangan nila, ug dili sila makalingkawas gikan sa mga kalisod.
- Ang pagpangutang ug ang paglending, kadaotan para sa gabuhat niini.
- Ayaw pagpasangon sa mga utang. Maghago hinuon kita, magpagiya kita sa Dios ug magsalig kita kaniya para sa atong mga kinahanglanon.
- Ug kung pobre ka, usisaha ang imong mga gabuhaton kay kung kargado ka ug mga bisyo, basin ang imong mga bisyo maoy gababag kanimo sa pagtagbo sa kinahanglanon sa pamilya.
- Tangtanga ang mga bisyo gikan sa imong kinabuhi ug basin makita dayon nimo nga mag-arang-arang ang imong kahimtang ug ang kahimtang sa imong pamilya. Importante kini mga igsoon.
- Kung gadagmalan ra nimo ang imong kuwarta diha sa mga bisyo, ug kung dili pud ka gatrabaho ug kusog, basin talagsa ra nga igsoon ang gustong motabang kanimo kung naay moabot kanimo nga kalisod.

Tambag Para Sa Dato Nga Mga Igsoon

⇒ Alang sa igsoon nga arang-arang o dato, kinahanglan nga ilhon nimo nga gikan sa Dios ang tanang anaa kanimo.

→ Iya gayod sa Dios ang tanan nimong kuwarta. Sugta si Ginoo nga magamit ka niya, ipagamit sa Dios ang imong kuwarta aron itabang ngadto sa mga pobre ug itabang sa pag-finance sa trabaho sa Ginoo.

→ Sugta ang Dios nga iyang gamiton ang kuwarta nga iyang gipiyal kanimo.

→ Magbasa sa kita sa pipila ka bersikulo, ug ikaw nga dato nga igsoon, susiha ang imong kasingkasing.

Galacia 6:10

Busa, ingon nga kita adunay kahigayonan, buhaton nato ang maayo ngadto sa tanang mga tawo, ilabi na kanila nga mga sakop sa panimalay sa pagtuo.

Santiago 5:1-6

¹ Kamong, mga dato, panghilak ug paniyabaw kamo tungod sa mga kalisdanan nga taliabot kaninyo. ² Ang inyong kadato nangadunot ug ang inyong mga bisti gipangotkot sa mga mananap. ³ Ang inyong bulawan ug salapi gitay-an, ug ang ilang taya mahimong saksi batok kaninyo, ug mag-ut-ot sa inyong unod sama ka kalayo. Kamo nagtigom ug bahandi alang sa kataposang mga adlaw. ⁴ Tan-awa, ang mga suhol nga inyong gitikas gikan sa mga mamumuo nga nag-ugmad sa inyong kaumahan nagsinggit, ug ang mga singgit sa mga nag-ani midangat sa mga dalunggan sa Ginoo sa mga panon. ⁵ Dinhi sa yuta kamo nagpuyo sa kaharuhay ug sa pagpatuyang diha sa kahilayan. Kamo nagpatambok sa inyong mga kasingkasing alang sa adlaw sa ting-ihaw. ⁶ Kamo naghukom, inyong gipatay ang matarong nga wala mosukol kaninyo.

⇒ Sa ato pa, gusto sa Ginoo nga pulusan nato ang mga higayon ug buhaton nato ang maayo ngadto sa tanang tawo, ilabi na sa atong mga isigka-magtutuo.

→ Usahay gakinahanglan ug tabang ang atong mga pobre nga igsoon, ug ang mga igsoon nga adunay kahimo, makatabang sila ilalom sa giya sa Dios. Kitang tanan, kung dato o kung pobre, naa kitay makatabang sa atong mga pamilya diha sa pagtuo. Ug katongdanan natong tanan ang pagtabang.

→ Basin gani naay igsoon nga makabaligya ug yuta sama sa gibuhay ni Bernabe, alang sa kinahanglanon sa iyang mga igsoon o alang sa trabaho sa pagpakaylap sa pulong sa Ginoo.

→ Usa kini ka maayong ambisyon alang sa mga igsoon nga adunay mga kayutaan.

→ Iya sa Dios ang tanan, busa ang mga tawo nga gaipahawid sa Dios sa kuwarta, gamay o kung dako, maayo kung manggihatagon gayod sila.

→ Kung mosugot ang mga igsoon nga mahimo silang sandayong para gaagihan sa mga panalangin gikan sa Ginoo, basin makita nila nga sigi sila gaulanan.

→ Ug ang mga dato nga naay mga trabahante o mamumuo, kinahanglan nga magsuhol sila ug insakto ug dili manikas, kay gasinggit ang mga trabahante diha sa ilang kasingkasing batok sa ilang mga agalon kung dili sila suholan ug insakto. Wala silay ipalit sa pagkaon para sa ilang mga pamilya kung dili sila suholan.

→ Mas maayo pa kung sobra ang imong isuhol sa imong mga tawo kay sa kulang.

→ Ug ang naay agalon, kinahanglan nga dili usab niya bintahaan ang iyang agalon. Pagtrabaho ug insakto para sa imong agalon, kung gatan-awon ka o kung dili.

Tambag Para Sa Tanan

1 Timoteo 6:6-10

⁶ Hinuon adunay dakong makuha diha sa pagkadiosnon nga inubanan sa katagbawan,
⁷ kay wala kitay bisan unsa nga gidala nganhi sa kalibotan ug dili kita makadala ug bisan
unsang, ⁸ apan kon kita adunay makaon ug ikabisti, niining mga butanga matagbaw na kita.
⁹ Apan sila nga maikagon nga mahimong dato mangahulog ngadto sa pagpakasala, ngadto
sa laang, ngadto sa daghang binuang ug makadaot nga mga pagpangibog nga nag-unlod sa
mga tawo ngadto sa pagkagun-ob ug sa pagkalaglag. ¹⁰ Kay ang paghigugma sa salapi mao
ang gamot sa tanang pagkadaotan ug tungod sa maong pangibog may mga tawo nga
nahisalaag gikan sa pagtuo ug ilang giduslak ang ilang kaugalingon sa daghang kasakit.

⇒ Tudloi ug bansaya ang imong kaugalingon sa pagkatagbaw o pagkuntento, bisan unsay ihatag
kanimo sa Ginoo nga kahimtang. Pagkinabuhi diha sa pagkadiosnon, alang sa Ginoo. Kay dako ang
imong makuha kung kuntento ka ug diosnon ka.

→ Apan ang tawo nga gustong mahimong dato, maunlod ngadto sa pagkagun-ob ug sa
pagkalaglag.

→ Mga igsoon, kinahanglan nga makuntento ra kita sa gihatag sa Ginoo kanato. Makakaon lang kita
ug makabisti, matagbaw na kita niini.

⇒ Naa pay usa ka tambag alang kanatong tanan, mga igsoon.

Santiago 4:12

Usa ra ang tighatag ug balaod ug maghuhukom nga makahimo sa pagluwas ug sa
paglaglag. Apan ikaw, si kinsa ka man nga nanghukom sa imong silingan?

⇒ Mga igsoon, daghan ang mga bersikulo nga gahisgot sa topic sa paghinukmanay. Apan ang
pinakatamong nilang punto, dili kita maghinukmanay, mao ray atong hukman ang atong kaugalingon.

→ Nakabalo kita sa sulod sa atong kasingkasing apan wala kita makabalo kung unsa ang anaa sa
kasingkasing sa atong isigka-tawo.

→ Kung dato ka, ayaw hukmi ang imong pobre nga igsoon sa ingon, "Tapolan kadto siya! Kung
maningkamot lang, dili siya maparehas ana." Apan wala baya ka nasayod kung unsay kinabuhi
adtong igsoon nimo nga pobre. Basin gakalisod gyod siya ug angayan nimong tabangan. Pagiya sa
Ginoo kung unsaon nimo siya pagtabang.

→ Ug kung pobre ka, ayaw usab hukmi ang imong igsoon nga dato nga, "Naa napod si tambok nga
dato, gasigi rag kaon pero dili pakakita sa uban, hangol." Wala baya ka nasayod sa kinabuhi sa imong
igsoon nga dato, kung kinsa ang iyang gatabangan ug kung unsa ang gaigiya kaniya sa Ginoo nga
iyang buhaton sa iyang kuwarta. Basin gakapuslan pag-ayo sa Ginoo ang iyang kuwarta, apan wala
ka masayod.

→ Dili kita maghinukmanay.

⇒ Agi pagsira, magtinabangay gayod kita mga igsoon. Dili nato hunahunaon nga atoa ra ang atong kuwarta ug ang atong kabtangan, kay iya man kadto tanan sa Dios. Magtinabangay kitang managsoon, kung dato kita o kung pobre, sama sa gibuhat sa atong mga igsoon sa Jerusalem.

→ Mga igsoon, magtrabaho kitang tanan ug tudloan usab nato ang atong mga anak sa paghago. Usahay ang anak sa dato, dili gustong motrabaho, apan kinahanglan nga motrabaho sila kay maoy disenyo sa Ginoo para kanatong tanan.

→ Mga igsoon, motrabaho kita aron naa kitay ibuhi sa atong mga pamilya, ug aron naa kitay itabang sa mga igsoon nga gakinahanglan, ug aron naa kitay isuporta sa mga trabaho sa Ginoo.

→ Ug ang atong Ginoo, maoy manalangin ug mag-amoma sa kada usa kanato!

Homework:

⇒ Palihog basaha ninyo pag-usab ang Mga Buhat kapitulo 4 ug hisgot-hisgoti ninyo diha sa tibuok ninyong panimalay.